



Bishita na Parke Solar na Aeropuerto Internacional Reina Beatrix

ORANJESTAD – E prome bishita di reconocimiento cu participantenan di Aruba Learning Event a realisa dialuna mainta tabata na e Parke Solar na Aeropuerto Internacional Reina Beatrix. Aki un delegacion di Aruba Airport Authority N.V., encabesa pa CEO James Fazio a ricibi e grupo expresando palabra di bon bini y tambe con orguyoso e entidad ta sinti di por ta sede di un di e proyectonan di sostenibilidad na Aruba.

Den presencia di Minister di Asuntonan Economico, Comunicacion, Energia y Medio Ambiente Mike de Meza y director di N.V. Elmar, Robert Henriquez, a ofrece un presentacion caminda a actualisa riba e progreso haci desde e ultimo evento di Green Conference na October 2014. Elton Lampe, Business Development Officer of N.V. Elmar a splica na esunnan presente cu a pesar cu e clima tabata uno hopi nubia den dia di ayera, sinembargo e parke solar ta keda produci energia cu e rayonan di

solo cu ta pasa dor. Completa na luna di maart ultimo cu e finalisacion di e di dos fase, e parke solar tin un capacidad total di 3.47 Mhw.

E factor cu no solamente ta un instalacion pa genera coriente pa medio di energia solar, pero tambe ta funciona como garashi publico, ta haci di dje un di e proyectonan mas grandi den Caribe. Participantenan di e Aruba Learning Event ta consisti di funcionario, ingeniero y ehecutivonan publico di diferente nacion y entidad rond mundo. Nan ta na Aruba pa dos

dia y asina conoce mas di cerca e iniciativa y avancenan realisa dor di nos isla den e meta pa sostenibilidad total. E bishita na Parke Solar na Aeropuerto Internacional Reina Beatrix tabata djis un punto den e programa di e dia di ayera cu a inclui tambe Parke di Molina di Biento na Vader Piet, Planta di WEB Aruba N.V. y tambe e sede di MFA na Noord, como ehempel di edificio publico cu ta auto sostenibel pa medio di panelnan solar y ta aporta na e produccion nacional di energia renobabel. □